



Stads a la radunanza da delegads da la Gastro Grischun èn er cusseglier guvernativ Hansjörg Trachsel (san.) e deputà Jon Domenic Parolini.



Segnan per il manaschi da Gastro Grischun: Fluregn Fravi, mainagestiu e Georgette De-dual, dapi 30 onns secretaria.



Trais ustiers sursilvans da trais bunas adressas: Linus Arpagaus, Tino Zimmermann e Thomas Gautschi (da san.).

«Almain tadlar sin nus è gia in pau»

Gastro Grischun: Radunanza da delegads 2013

DA GION NUTEGN STGIER / ANR

■ **En l'avegnir vegnia il chantun a sustegnair concepts turistics da destinaziuns, ha ditg cusseglier guvernativ Hansjörg Trachsel. Il vicepresidente da Gastro Suisse, Ernst Bachmann, pretendia da la confederaziun damain formalitads per la bransch.** Cun esser *Andy Abplanalp*, dapi il 1990 president da Gastro Grischun, absent, ha *Annalisa Giger*, la vicepresidente, manà la 99. radunanza da delegads da l'uniun che unescha ils ustiers da noss chantun. Ils tractandums statutarics han procurà per naginas discussiuns. Il quint annual 2012 serra cun in gudogn da stgars 59 000 francs, quai tar entradas e sortidas dad 1,2 milliuns francs. Clers plets e cunzunt er pretensiuns a la politica èn vegnids dad *Ernst Bachmann*, il vicepresidente da Gastro Suisse. Quai che pertutga ina reducziun da la taglia sin la plivalur per ils ustiers spera el ch'il cussegl federal preschentia fin il 2017 ina soluziun. L'ustier da Turitg ha schizunt er ditg ch'i manchia pauc che mintga manaschi pli grond dovria bunamain in segund schef cuschinier be per plenir or formulars e declaraziuns. En quella chausa vegni surfatg. Quai che pertutga las directivas da l'igièna saja dentant da

pretender dapli conuschientschas da tuts quels che surpiglian restaurants. Ernst Bachmann ha er menziunà che en il futur vegnia cunzunt la generaziun giuvna dals ustiers a guardar pli bain sin la «detta» dals represchentants da la politica a Berna. Il vicepresidente da Gastro Suisse ha supplitgà ils cussegliers nazionals e cussegliers dals chantuns d'almain tadlar sin ils ustiers. Quai saja gia in pau per chattar soluziuns cuminaivlas e per sustegnair e dar dapli muntada a la bransch da la gastronomia. L'idea dals sindicats dad auzar danovamain las pajas minimalas saja en tuttas modas e manieras ina vaira illusiuin, ha ditg Ernst Bachmann.

In mund d'aventuras

Cusseglier guvernativ *Hansjörg Trachsel* ha ditg che suenter il naufragi dals Gieus olimpics 2022 en il Grischun vegnia il chantun segir a sustegnair projects sco campiunadis mundials da skis ed autras occurrenz che procuran per ina valur agiuntada. El ha er menziunà che sustegnids vegnian concepts turistics da destinaziuns. Oz vul il giast in mund d'aventuras e betg mo ina singula purschida. «Be communabel vegnin nus tar resultats», ha accentuà l'actual president da la regenza grischuna. *Hansjörg Trachsel* ha

er manegà che segir vegnian adina dapli giasts da las terras asiaticas, dentant quels prefereschian bunamain da dar or ils daners en bischutarias etc. enstagl per hotels.

Cler per ina reducziun da la taglia sin la plivalur

Cusseglier nazional *Heinz Brand* ha ditg ch'el saja cler per ina reducziun da la taglia sin la plivalur per la bransch da la gastronomia. El haja er sutscrit l'iniziativa e vegnia a s'engaschar per ina gistadad da la taglia sin la plivalur per ils ustiers. Sustegnair l'iniziativa vul er cusseglier nazional *Martin Candinas*. Cun quellas duas propostas dal cussegl federal fissan integradas quellas pretaisas dals ustiers. Jau ves dentant betg sco realistic ch'i vegn introduci la taxa bassa, dentant pli tgunsch ch'i vegn auzà la taglia sin la plivalur sin 3,8% per ils manaschis da «take-away», ubain ch'i resta tar il status quo e lura è decisiv quai che succeda cun l'iniziativa. Cusseglier dals chantuns *Stefan Engler* ha ditg ch'el appartegna a la cumissiun che vegnia a tractar la taglia sin la plivalur. Suenter la stad s'occupeschia la cumissiun cun quel tema. El saja cler per in tractament egal e vegnia a sustegnair ina reducziun da la taglia sin la plivalur per ils ustiers e s'engaschar per ina taxa unificada.



Politica ed economia unida: cusseglier nazional Martin Candinas (san.) ed Urs Schmid, «CEO» Passugger SA.



Ustieras da la Val Alvra e da Surses: Anna Uffer, Teresina Krüger-Luzio e Karin Hersche (da san.).



Tranter ils giasts dals ustiers er Ueli Cavelti (san.), mainagestiu da vendita da la Heineken SA e Silvio Schmid, president Grischun Pendicularas.



L'ustier engiadinais Claudio Bernasconi (san.) e cusseglier nazional Heinz Brand.